

## Dick

Tengo 'nu cane ch'è fenomenale,  
se chiama "Dick", 'o voglio bbene assaie.  
Si perdere l'avesse? Nun sia maie!  
Per me sarebbe un lutto nazionale.

Ll'aggio crisciuto comm'a 'nu guaglione,  
cu zucchero, biscotte e papparelle;  
aggio tirato su cu 'e mmullechelle  
ll'aggio dato buona educazione.

Gnorsi, mo è gruosso. È quase giuvinotto.  
Capisce tutto... lle manca 'a parola.  
E' cane 'e razza, tene bbona scola,  
è lupo alsaziano, è poliziotto.

Chello ca mo ve conto è molto bello.  
In casa a ha stabilito 'a gerarchia.  
Vo' bene 'a mamma ch'è 'a signora mia,  
e a figliemo isso 'o tratta da fratello.

'E me se penza ca lle songo 'o pate:  
si 'o guardo dinto a ll'uocchie mme capisce,  
appizza 'e rrecchie, corre, m'ubbidisce,  
e pe' fa' 'e pressa torna senza fiato.

Ogn'anno, 'int'a ll'estate, va in amore,  
s'appecundrisce e mette 'o musso sotto.  
St'anno s'è 'nammurato 'e na bassotta  
ca nun ne vo' sapè: nun è in calore.

Povero Dick, soffre 'e che maniera!  
Porta pur'isso mpietto stu dolore:  
è cane, sì... ma tene pure 'o core  
e 'o sango dinto 'e vvene... vo' 'a mugliera...